

provisto, pregandone, incitandone, et exortandone che, per l'honor de Dio, nostro creatore, de la ditta cristianità et de la nostra ditta fede catholicha, vogliamo haver risguardo, et dal canto nostro far qualche sforzo e demonstratione, a effecto de ajutar et resistere a la deffesa del dito turcho, et per rebater la sua ditta armada, fazendo meter suso, preparar et equipar qualche numero de navilij, a fin che ciaschaduno cognosca el nostro bon voler verso la ditta cristianità, essendo deliberado dal canto vostro far el simigliante. Altissimo, potentissimo principe, nostro carissimo et amantissimo fradello e cuxim, despiacentissimi semo de intendere che 'l nostro comune inimicho de la fede catholicha, sia cussi deliberado con sua posanza de descendere et invader cussi brevemente la cristianità, et che noi semo cussi lontani dal locho che diceti, dove l'intende far sua ditta disesa, che non la podemo aidar, nè remediare la nostra parte cussi prontamente, come de tutto el nostro cuor et bon voler desideremo far. Ma, altissimo et potentissimo principe, nostro carissimo et amantissimo fradello e cuxim, da poi che havemo comunicado longamente de questa materia, insieme con le zente del nostro consiglio, el ne pare, et a l'horo insieme, che questa seria cossa forte difficile, e quasi impossibile, che cussi subitamente potesse mandar per resistere et impazar la sua ditta desessa, et che avanti che noi potessimo far preparar i nostri preditti navilij de tutte cosse che li seriano necessarie, tanto de zente, artilarie, vituarie, et altre munitione, et che potessimo esser gionta ne le parte, dove el ditto turcho intende far sua ditta desesa, come diceti per vostre ditte lettere, posito che havessimo vento propicio o tempo conveniente per far e compir questo, atento el longo viazo et camin che haveriano a far et explorar per mare, el saria a presso San Michiel, avanti che potessimo zonzer ne le parte de sua ditta desesa. A dir el vero, questa non seria che spexa fata et consumada invano, senza nè servir nè zovar; ma quando cussi intravegnisse, che Dio non lo voglia, che 'l ditto turcho fosse deseso ne la ditta cristianità, con animo et volontà di voler continuare, voi et tutti li altri principi cristiani podeti esser sicuri, perchè noi cognoscemo essere el debito nostro in tutto quello ch'è possibile a noi, ne harà a ribatterlo et discazarlo fuora di quella, in modo che al piacere de Dio creator ogni uno cognoscerà che a nostro poder li haveremo messo la mano cussi come ogni uno bon principe cristiano debbe, et è obligato di far, per la difenza de la nostra ditta fede catholicha, essendo cussi lontani dal luogo de la sua ditta

desesa, como noi semo. Et de questo, voi et li ditti altri principi christiani, ve ne poteti tenir securi; pregandovi più instantemente et de bon cuore, che far podemo, che 'l ve piaqua de la sua ditta desesa, se fata la hè, avisarne et advertir, a fin che podemo far le preparatione nostre, secondo che rechiederà el bisogno, insieme di vostri navilij; cussi le vegnirano, e cussi ne fareti piacere grandissimo, et cussi el benedeto Santo Spirito, altissimo et potentissimo principe, nostro carissimo et amantissimo fradello e cuxin, ve voglia conservar e guardar.

Scrita in la città nostra de Londra, el septimo zorno de aprile, l'ano 1500, avanti pasqua.

La sottoscrizione: Vostro bon et leal fradello,
ANRIGO RE DE INGLITERA.

Et poi: M. M. Cautis.

A tergo: A lo altissimo et potentissimo principe, nostro carissimo et amantissimo fradello e cuxim, el re Lodovico de Franza.

Di Albania, di sier Andrea Michiel, provedador, data ai Rodoni, a dì 12 april, et etiam sier Hironimo Picani, provedador di l'armada, data ivi, in galia, qual è lì con la galia di sier Polo Nani. Conclusive, avisano di quelle cosse la salvatione saria, se li mandasse Schandarbecho. Et è da saper, nostri, a uno locho nominato Chovrili, fabricano una terra; et vi fo mandà per il conseio di X Marin di Greci, dove vi hè insieme col prefato proveditor a questo effecto.

Di Cataro, dil retor e provedador. Zercha provisione fate de lì, e nove di turchi di la Vajusa; tutte cosse si sapeva.

In questa matina, Jo fici risponder a la lettera dil re di Rossia; *videlicet* di la bona amicitia; et questo perchè li oratori lo rechieseno. *Et ita factum fuit literæ, consulente collegio.*

Da poi disnar, fo pregadi. Vene il principe, et stete pocho. Fo leto le infrascripte lettere, venute da poi disnar:

Da Padoa, di Alvixe Manenti, secretario dil conseio di X, data eri. Avisa dil zonzer li col cardinal Aseanio, a hore 18, et trovò li rectori li veneno contra, alozò im palazzo di sier Nicolò Foscarini, capetanio, in la chamera Barbariga. Era con lui Andrea Vasalo e Marco Saxo, capetani, et domino Sonzim Benzom, et assa' altri per custodia; et ricevete l'hordine di andar uno di rectori con lui fino a li confini di Vicenza; e cussi sier Lunardo Mocenigo, podestà, era andato con esso cardinal con bona custodia, verso Vicenza.